

Puspè duas linguas tar admissiun a las scolas medias

■ (cc) En il rom da la procedura d'admissiun al gimnasi inferior vegnan en l'avegnir puspè resguardadas en il chantun Grischun duas linguas chantunales tar tut las scolaras e tut ils scolars. Quai ha concludì la regenza cun metter en vigur per il 1. d'avust 2011 ina revisiun parziala correspundenta da l'ordinaziun davart la procedura d'admissiun a las scolas medias.

Sin fundament d'ina decisiun da la dretgira administrativa aveva la regenza adattà il matg 2009 ils roms linguistics che ston vegnir examinads tar la procedura d'admissiun al gimnasi inferior. Da quel temp n'eri betg pussaivel da resguardar ina segunda lingua chantunala tar la procedura d'admissiun per las scolaras e per ils scolars tudestgs, sco quai ch'igl era il cas tar las scolaras e tar ils scolars rumantschs e talians. Durant ina

fasa transitorica èn pervia da quai tut las scolaras e tut ils scolars vegnids examinads mo pli en lur emprima lingua. En il fratemp è la situaziun sa midada per las scolaras e per ils scolars tudestgs, uschia che duas linguas chantunales pon vegnir resguardadas a partir da l'onn chalendar 2012 er per els tar la procedura d'admissiun al gimnasi inferior.

Tar la procedura d'admissiun na vegni en l'avegnir dentant betg fatg dus examens separads en ils roms linguistics. Entant che l'emprima lingua vegn examinada sco fin ussa cun in examen d'admissiun en scrit, resulta la nota da la segunda lingua chantunala – ch'è relevanta per la procedura d'admissiun – da las prestaziuns da scola validadas durant l'emprim semester da l'onn da scola current, per regla da la 6. classa primara.